

POPERA GA PIRIPUWA YEXMAGÜXÜ GA YAXÖGÜXÜTANÜWA NAMUXÜ GA PAURU

**Pauru rü nüxü narümoxe ga yema
yaxögüxü ga Piripuwa yexmagüxü**

1 ¹Pa Toeneëgü ya Piripuwa Ngëxmagüxex, choma i Pauru rü namaã i taeneë i Timutéu nixi i pexçax tanaxümatüxü i ñaã popera. Rü toma rü Ngechuchu ya Cristuarü puracütanüxü tixigü. Rü pexçax tanaxümatü i pema i yaxögüxüârü âëxgacügü na pixigüxü, rü pema i tupaucawa ngüxëëtaeruügü na pixigüxü, rü guxäma i pema i Ngechuchu ya Cristuaxü yaxögüxe. ²Rü chanaxwaxe i Tanatü ya Tupana rü törü Cori ya Ngechuchu ya Cristu poraäcü pexü narüngüxëë rü pexü nataäëxëë.

Pauru rü yema yaxögüxüçax nayümüxë

³Rü guxüguma i ngëxguma pexna chachuaxächixügü rü Tupanana moxë chaxä i pexçax. ⁴Rü ngëxguma chayümüxëgux, rü guxüguma chataäëäcüma pexçax chayümüxë i guxäma i pemax. ⁵Erü pema rü noxritama Tupanaärü orexü pexinüëgumama rü poraäcü choxü perüngüxëë na nüxü chixuxüçax i norü

ore i mexü. Rü ñuxma rü ta choxü perüngüxëëgüecha. ⁶Rü Tupana rü marü inanaxügü i wüxi i mexü i puracü i perü maxüwa. Rü nüxü chachuax rü nüma rü guxügutäma nanaxüecha i ngëma puracü ñuxmatáta yanguxëëä i ngëxguma ínguxgu ya Ngechuchu ya Cristu. ⁷Rü aixcüma name na ngëmaäcü pemaã nagu charüxínüxü, erü poraäcü pexü changechaü rü aixcüma Tupana wüxigu tüxü narüngüxëë i guxäma i yixema. Rü woo ñuxma na chapoxcuxü rü exna ega äëxgacügüpexewa choxü nagagügu, rü Tupana choxü narüngüxëë i ngëxguma norü ore i mexüétüwa chideaxgu rü namaã nüxü chixuxgu i äëxgacügü na aixcüma yiixü i ngëma orewa nüxü iyarüngauxü i törü maxü i taguma gúxü. Rü nüxü chachuax rü ngëma choxü nangüxëëxüäcüma, rü pexü rü ta narüngüxëë. ⁸Rü Tupana nüxü nachuax na ñuxäcü poraäcü pexü chadauxchaüxü rü pexü na changechaüxü i guxäma i pemax, ngëma Ngechuchu ya Cristu pexü na ngechaüxürüü. ⁹Rü chorü yumüxëwa naxçax íchaca na yexeraäcü pegü

pengechaũgũxũcax rü Tupanaxũ
 pengechaũgũxũcax. Rü naxcax íchaca
 na yexeraãcü nüxũ pecuáxũcax i
 guxũma i Tupanachiga rü yexeraãcü
 nüxũ pecuáxũcax na ñuxãcü
 nanaxwaxexũ na naxcax pemaxẽxũ.
¹⁰Rü ngẽmaãcü pexcax chayumũxẽ erü
 chanaxwaxe na meã penangugũxũ i tacü
 nixĩ i aixcũma mexũ i Tupanapexewa na
 penaxũxũcax i ngẽma. Rü chanaxwaxe
 na aixcũma namexũ i perü maxũ na
 taxucaxma tacũcax Tupana pexna
 caxũcax i ngẽxguma ínanguxgu ya
 Cristu. ¹¹Rü naxcax íchaca na
 Ngechuchu ya Cristu pexũ
 narũngũxẽxũ na aixcũma namexũcax i
 perü maxũ rü aixcũma penaxũxũcax i
 ngẽma Tupanapexewa mexũ na
 ngẽmaãcü meã pemaxẽãcũma Tupanaxũ
 picuaxũũgũxũcax.

**Chauxcax rü Cristuarü ngúchaũ na
 chaxũxũcax nixĩ i chamaxũxũ**

¹²Pa Chaueneẽgũx, rü chanaxwaxe i
 nüxũ pecuax rü guxũma i ngẽma choxũ
 üpetũxũ, rü aixcũma ngẽmaãcü choxũ
 naxüpetü na yexeraãcü natachigaxũcax i
 Tupanaãrũ ore i mexũ. ¹³Rü ñuxma i
 núma rü guxũma i churaragü i
 ãẽxgacüpataarü dauruũgü rü guxũma i
 togü rü ta nüxũ nacuaxgü na
 chapoxcuxũ naxcax na Cristuarü duũxũ
 chíxũ. ¹⁴Rü ñuxma na chapoxcuxũ rü
 muxũma i taeneẽgü i yaxõgũxũ rü tama
 namuũẽãcũma nüxũ nangúchaũ na
 nüxũ yaxugũxũ i Tupanaãrũ ore i
 mexũ. Rü yexeraãcü tórü Coriaxũ
 nayaxõgü. ¹⁵Rü aixcũma nixĩ i ñuxre i
 duũxũgü rü togũxũ na
 yaxãũxãchixẽẽxũcaxmare nüxũ

nixugũxũ i Cristuchiga, erü togũxũ
 narüyexerachaũ. Natürü nangẽxma i
 togü i duũxũgü i aixcũma mexũgu
 naxĩnũẽãcũma meã nüxũ ixugũxũ i
 ngẽma ore. ¹⁶Rü ñuxre i duũxũgü rü
 Cristuchigaxũ nixugũe erü choxũ
 nangechaũgü rü nüxũ nacuaxgü na
 Tupana nuxma choxũ muxũ na
 íchanapoxũxũcax i norü ore i mexũ.
¹⁷Natürü nangẽxma i togü i noxrütama
 ngúchaũcax daugũxũ rü ngẽmacax nüxũ
 ixugũxũ i ngẽma ore. Rü nümagü rü
 tama mexũgu narũxĩnũẽ, natürü naxcax
 nadaugü na yexeraãcü choxũ
 naguxchaxẽẽgũãxũ i ñuxma na
 chapoxcuxũ. ¹⁸⁻¹⁹Natürü nüẽtama nixĩ
 ega woo ngẽmaãcü yixĩgu. Erü woo
 mexũ i norü ngúchaũmaã yixĩgu rü
 exna tama, natürü Cristuchigaxũ
 nixugũe. Rü ngẽma rü wüxi i taãẽ nixĩ i
 chauxcax. Rü guxũgutáma chataãẽẽcha
 erü nüxũ chacuax rü guxũma i ngẽma
 rü chorü mexũcax tá nixĩ erü chauxcax
 peyumũxẽgü rü choxũ narũngũxẽẽ i
 Tupanaãẽ i Üünexũ i Ngechuchu ya
 Cristuxũ rüngũxẽẽxũ. ²⁰Rü ngẽma
 poraãcü chanaxwaxexũ nixĩ na taguma
 tacü rü chixexũ na chaxũxũ na
 taxucaxma chaugũcax chaxãnexũcax.
 Rü chanaxwaxe i guxũguma
 íchamemare na guxãpexewa tama
 chamuũãcũma Cristuchigaxũ chixuxũ.
 Rü ñuxma na chamaxũxũ rü
 chanaxwaxe i guxũguma
 aixrũgumarũũtama Cristuxũ chicuaxũũ
 rü chanataxẽẽ. Natürü ngẽxguma woo
 chayuxgux, rü chanaxwaxe i ngẽmaãcü
 rü ta chanataxẽẽ. ²¹Erü chauxcax rü
 Cristuarü ngúchaũ na chaxũxũcax nixĩ i
 na chamaxũxũ. Natürü ngẽxguma

chayuxgux rü ngêma rü ta name, erü Cristuxütawa tá changêxma i ngêxguma. ²²Natürü tama nüxü chachuax i tacü nixí i rümemaêxü i chauxcax, ngêma na chayuxü rü exna tama. Erü ñuxma na chamaxüxü rü choxü natauxcha na chanaxüxü i tórü Coriarü puracü. ²³Rü ngêmacax tama nüxü chachuax na tacü yíxü i chauxcax rümemaêxü i ngêma taxrewa. Erü ñuxguaci rü chanaxwaxe na chayuxü na Cristuxütawa changêxmaxüçax. Rü ngêma nixí i aixcüma yexera rümemaêxü i chauxcax. ²⁴Natürü i pexcax rü nagu charüxínü rü narümemaê nixí na ñoma i chaxunemaâtama na chamaxüxü na ngêmaäcü pexü charüngüxêxüçax. ²⁵Rü ñuxma na aixcüma meã nüxü chachuáxü na pechoxwaxexü, rü ngêmawa nüxü chachuax na täütama paxa chayuxü. Rü ngêmaäcü tá chamaxäma na pexü charüngüxêxüçax na yexeraäcü Cristucax pemaxêxüçax rü yexeraäcü taãêücüma nüxü peyaxögüxüçax. ²⁶Rü ngêmaäcü wena táxarü petanüwa changêxma. Rü ngêxguma wena choxü pedaugügu rü aixcüma tá petaãëgü erü tá pexü nangêxma na tacüçax Ngechuchu ya Cristuxü picuaxüügüxü. ²⁷Rü ngêma guxüärü yexera rümemaêxü nixí na naxcax pedauxü na meã pemaxêxü, ngêma Cristuarü ore pemaã nüxü ixuxürü. Rü ngêxguma petanüwa chaxüxgu rü exna woo tama ngêma chaxüxgu, natürü nüxü chaxínüchaü na guxäma wüxigu pegü peporaexêxü na taguma nüxü perüçauxüçax na aixcüma peyaxögüxü, rü ngêmaäcü Tupanaãxü pepuraciexü na yexeraäcü

yaxüchigüxüçax i norü ore i mexü. ²⁸Rü ngêmacax penaxwaxe i tama texéxü pemuüêücüma nüxü pixugüama i ngêma ore. Rü ngêma na tama nüxü pemuüêxü rü ngêma rü wüxi i cuaxruü tá nixí nüxü i perü uwanügü. Rü ngêmawa tá nüxü nacuaxgü na poxcuwa tá naxíxü i nümagü natürü pema rü tá maxüwa na pexíxü. Rü Tupana tá nixí ya pexü rüngüxêcü na tama nüxü pemuüêxüçax i ngêma perü uwanügü. ²⁹Rü Tupanaga nixí na Cristuaxü peyaxögüxü. Rü ngêxgumarü ta naga nixí na Cristucax ngüxü pingegüxü. Rü ngêma rü wüxi i ngüxê nixí i pexna naxäxü ya Tupana. ³⁰Pema rü choma rü wüxigu Tupanaärü puraciüwa tangêxmagü, rü tanaxüama i ngêma puraciü ega woo texé tüxü naguxchaxêëgux. Rü üpa rü marü choxü pedau na ñuxäcü meã chanaxüxü i ngêma puraciü, rü ñuxma rü ta nüxü picuáchiga na ñuxäcü chanaxüamaxü woo namu i chorü guxchaxügü.

Cristu rü ñoma taxuüma yíxürü nügü nixíxê rü yemacax ga Tupana rü guxüärü äëxgacüxü nayaxíxê

2 ¹Rü dücax, Pa Chaueneëgüx, rü ñuxma na Cristuarü duüxügü pixíxüxü, ¿rü aixcüma yíxü i nüma pexü nataãêxêxü? ¿Rü aixcüma yíxü i petaãëgüxü erü nüma pexü nangechaü? ¿Rü aixcüma yíxü i Tupanaäe i Üünexü pexütawa ngêxmaxü? ¿Rü aixcüma yíxü i pegü pengechaügüxü rü pegüxü pengechaütümüügüxü? ²Rü ngêxguma chi ngêmaäcü yixígu, rü chanaxwaxe i guxäma wüxigu perüxínüë, rü aixcüma guxäma pegü pengechaügü, rü aixcüma guxäma ñoma wüxítama piüxürü na

yīxŭ i peã, rŭ guxãma wŭxitama i ngŭchaŭcax pedau. Rŭ ngëxguma ngëmaãcŭ pemaxëgu rŭ wŭxi i chorŭ taã tã nixĩ. ³Rŭ tama name i tacŭ pexŭ na pegŭ íperŭtagŭxŭcax rŭ ngëmaãcŭ togŭarŭ yexera na pixŭgŭxŭcax. Natŭrŭ name nixĩ na pegŭ íperŭxíragŭxŭ rŭ pegŭgu perŭxĩnŭëxŭ na taxuŭma pixŭgŭxŭ rŭ togŭ rŭ perŭ yexera na yixŭgŭxŭ. ⁴Rŭ tama pegŭguxicatama perŭxĩnŭë, natŭrŭ pegŭ peporaexëëxŭ na togŭxŭ perŭngŭxëëgŭxŭcax! ⁵Rŭ name nixĩ ga yema Ngechuchu ya Cristu nagu rŭxĩnŭxŭgu na perŭxĩnŭëxŭ i pemax. ⁶Yerŭ nŭma rŭ woo ga Tupanaxŭchi na yīxŭ, natŭrŭ tama nŭgŭna nanachuxu na ínanguxuchixŭ nawa ga yema. ⁷⁻⁸Rŭ yemacax yéma nanatax ga norŭ mexŭgŭ ga daxŭguxŭ ga naãnewa. Rŭ wŭxi i duŭxŭ i togŭaxŭ puracixŭrŭŭ nŭgŭ nixŭxëë. Rŭ ñoma wŭxi i duŭxŭrŭŭ ñoma ga naãnegu nabu. Rŭ yexguma marŭ duŭxŭ yixŭgu ga nŭmax, rŭ ñoma taxuŭma yīxŭrŭŭ nŭgŭ nixŭxëë. Rŭ Tupanaga naxĩnŭ, rŭ yemacax curuchagu nayu woo ga wŭxi ga ãnexŭchi na yīxŭ ga yema. ⁹Rŭ yemacax ga Tupana rŭ guxŭãrŭ ãëxgacixŭ nayaxŭxëë, rŭ nayangucuchixëë na guxŭma i ãëxgacŭgŭétŭwa nangëxmaxŭcax. ¹⁰Rŭ yemaãcŭ nanaxŭ ga Tupana na Ngechuchupëxegu tacaxápŭxŭgŭxŭcax rŭ nŭxŭ ticuaxŭŭgŭxŭcax ya guxãma ya texë ya daxŭguxŭ i naãnewa ngëxmagŭxe, rŭ guxãma i ñoma i naãnewa ngëxmagŭxe, rŭ guxãma ya texë ya yuexŭchicawa ngëxmagŭxe. ¹¹Rŭ yemaãcŭ Tupana ãëxgacixŭ nayaxŭxëë na guxãma nŭxŭ ixuxŭcax na

tórŭ Cori yīxŭ ya Ngechuchu ya Cristu rŭ ngëmaãcŭ nŭxŭ icuaxŭŭgŭxŭcax ya Tanatŭ ya Tupana.

**Cristuarŭ duŭxŭgŭ rŭ ñoma omŭgŭrŭŭ
nixŭgŭ i natanŭwa i ngëma duŭxŭgŭ i
tama yaxŭgŭxŭ**

¹²Rŭ ñuxma na nŭxŭ pecuáxŭ na ñuxãcŭ Nanatŭga naxĩnŭxŭ ga Cristu, rŭ chanaxwaxe i chauga pexĩnŭë, Pa Chaueneëgŭ ya Pexŭ Changechaŭgŭxe. Rŭ yéma petanŭwa chayexmagu chauga na pexĩnŭëxŭãrŭ yexera chanaxwaxe i chauga pexĩnŭë i ñuxma na tama petanŭwa changëxmaxŭ. Rŭ chanaxwaxe i Tupanaxŭ pemuŭëãcŭma naxcax pedaugŭama i perŭ maxŭ i taguma gŭxŭ. ¹³Erŭ Tupana nixĩ ya perŭ maxŭwa puracŭcŭ na pexŭ nangëxmaxŭcax i perŭ ngŭchaŭ i mexŭ. Rŭ nŭma nixĩ i pexŭ nangŭxëëxŭ na naga pexĩnŭëxŭcax rŭ penaxŭxŭcax i ngëma nŭma pexŭ nanaxwaxexŭ. ¹⁴Rŭ meã penaxŭx i guxŭma i ngëma pexŭxŭ, rŭ tama naxcax pidexagŭ rŭ tama pegŭ naxcax pechoxŭgagŭ! ¹⁵⁻¹⁶Rŭ penaxwaxe i ngëmaãcŭ meã pemaxë na taxúema tacŭ rŭ chixexŭxŭ pewa iyangauxŭcax. Rŭ penaxwaxe i mexŭ i Tupanaxãcŭgŭ pixŭgŭ i natanŭwa i ngëma duŭxŭgŭ i chixexŭ rŭ chixëãëgŭmarexŭ. Rŭ ngëxguma ngëma duŭxŭgŭmaã nŭxŭ pixugŭyane i ngëma ore i mexŭ i tŭxŭ maxëxëëxŭ, rŭ yoxni natanŭwa rŭ ñoma woramacurŭgŭ ya ëãnexŭwa íbáixgŭcŭrŭŭ tá pixŭgŭ. Rŭ ngëmaãcŭ i ngëxguma wena nŭma naxŭxgu ya Cristu rŭ poraãcŭ tá pemaã chataãë erŭ tá nŭxŭ chadau na tama natŭcaxmamare yīxŭ ga yema puracŭ

ga petaniwa chaxuxũ. ¹⁷Rũ ngẽma ñuxma na meã peyaxõguxũ, rũ ngẽma nixĩ i perũ ãmare i Tupanana pexãxũ. Rũ ngẽma na meã yanguxũcax i ngẽma perũ ãmare i Tupanapexewa, rũ choma rũ íchamemare na Tupanacax ichanaxãxũ i chorũ maxũ rũ chayuxũ. Rũ ngẽmacax woo chayuxgu rũ wuxi i taãẽ tá nixĩ i chauxcax. Rũ chanaxwaxe i pemagũ rũ ta ngẽmacax wuxigu chomaã petaãẽgũ. ¹⁸Rũ ngẽmacax ega ngẽma ore i mexũcax chayuxgux, rũ tama name na pengechaũguxũ natũrũ penaxwaxe na wuxigu chomaã petaãẽguxũ.

Timutéu rũ Epaporudítchiga

¹⁹Rũ ngẽguma tórũ Cori ya Ngechuchu naxwaxegu rũ paxa petaniwa chanamuéga ya taeneẽ ya Timutéu na pexũ na íyadauxũcax rũ chataãẽxũcax i ngẽguma núma nangeãgu i pechiga. ²⁰Rũ aixcũma nataxuma i to i chorũ ngũxẽerũ i choma nagu charũxinũxũrũ nagu ruxĩnũxũ, rũ Timutéuxicatama nixĩ. Rũ nataxuma i to i naxrũ aixcũma pegu ruxĩnũxũ rũ pexũ rĩngũxẽẽchaũxũ. ²¹Erũ guxũma i togũ rũ naxcax nadaugũ i noxrũtama ngũchaũgũ, rũ tama aixcũma nagu narũxinũẽ i ngẽma Ngechuchu ya Cristuarũ ngũchaũ. ²²Natũrũ i pema rũ marũ nũxũ pecuax na ñuxãcũ meã namaxũxũ i Timutéu, rũ ñuxãcũ choxũ nangũxẽẽxũ i Tupanaãrũ orearũ uchigawa, ñoma wuxi i buxũ i nanatũxũ rĩngũxẽẽxũrũ. ²³Rũ ngẽmacax i ngẽguma nũxũ chacuaxgu na ñuxãcũ tá choxũ na naxũpetũxũ i núma, rũ ñuxũchi ngẽma petaniwa chanamuxchaũ i Timutéu na pexũ íyadauxũcax. ²⁴Rũ ngẽgumariũ ta nagu charũxũnũ rũ tórũ Cori rũ aixcũma tá choxũ

narũngũxẽẽ na chomatama ngẽma petaniwa íchayadauxũcax. ²⁵Rũ ngẽgumariũ ta rũ chauxcax name nixĩ i ngẽma petaniwa chanamuxũ i taeneẽ i Epaporudítu. Rũ núma nixĩ ga pematama chauxcax núma penamuxũ na choxũ nangũxẽẽxũcax. Rũ núma rũ chomũcũ nixĩ i Tupanaãrũ puraciwa, rũ poraãcũ choxũ narũngũxẽẽ i Tupanaãrũ orearũ uwa. ²⁶Rũ poraãcũ nũxũ nangũchaũ na pexũ íyadauxũ i guxãma i pemax. Rũ poraãcũ naxoegaãẽ, yerũ pema rũ nũxũ pecuáchiga ga na yaãaawexũ ga númax. ²⁷Rũ aixcũma nixĩ ga na yaãaawexũ, rũ wixguxũchi taax nayu. Natũrũ Tupanaãxũ nangechaũtũmũ rũ choma rũ ta nũxũ changechaũtũmũ, rũ yemacax naxcax nayataanexẽẽ na tama yexeraãcũ changechaũxũcax. ²⁸Rũ ngẽmacax rũ yexeraãcũ chanaxwaxe na paxa petaniwa chanamuxũ i Epaporudítu, na pema rũ petaãẽgũxũcax i ngẽguma wena nũxũ pedaugũgu. Rũ ngẽguma i choma rũ tá ta chataãẽ i ngẽguma nũxũ chacuaxgu na petaniwa nangẽmaxũ na pexũ nangũxẽẽxũcax. ²⁹Rũ chanaxwaxe i tórũ Coriéagu petaãẽgũãcũma meã penayaxu erũ peeneẽ nixĩ. Rũ name nixĩ i nũxũ pengechaũgũ i guxũma i ngẽma duũxũgũ i Epaporudíturũ ixĩgixĩ. ³⁰Yerũ núma ga Epaporudítu rũ yema na poraãcũ nawa napuracũxũ ga Cristuarũ puracũ, rũ yemacax wixguxũchi taax nayu. Rũ ãcũmaxũwa nũgũ nayexmaxẽẽ na pechicũ choxũ nangũxẽẽxũcax.

Ngẽma na Cristuxũ icuãxũ rũ ngẽma nixĩ i guxũãrũ yexera rũmemaẽxũ

3 ¹Rũ ñuxma Pa Chaueneẽgũx, rũ chanaxwaxe i petaãẽgũ erũ tórũ Coriarũ duũxũgũ pixĩgũ. Rũ yema ore ga

noxri pexçax chaxūmatūxū rü tama choxū
 nawaxtūmūū na wena pexçax
 chanaxūmatūxū erü aixcūma pexū name i
 ngēma ore. ²iRü pegūna pedax nūxna i
 ngēma duūxūgū i chixri maxēxū rü
 chixexūmaā pexū ixucuxēgūxū! Rü
 nūmagū nixī i nūxū yaxugūexū rü
 ngēxguma tama yigū
 fiwiechaxmūpexechiraūgu, rü
 taxucūriwama Tupanapexewa time.
³Natürü yīxema aixcūma Tupanapexewa
 imexē, rü yixema tixīgū. Rü Tupanaxū
 ticuaxūūgū i Naāē i Ūūnexūāri
 ngūxēēmaā. Rü tataāēgū erü Ngechuchu
 ya Cristuarū duūxūgū tixīgū. Rü tama
 tayaxōgū na ngēma yigū
 fiwiechaxmūpexechiraūxūçax
 Tupanapexewa imexū. ⁴Natürü choma chi
 waxi nixī i guxū i togūarū yexera
 chayaxōxū i ngēma
 wiechaxmūpexechiraūchiga. Rü tataxu
 chima ya toge ya texē chauxrūū yaxōxē i
 ngēmachiga. ⁵Yerū yexguma 8 ga ngunexū
 chauétū yixīgu ga na chabuxū, rü choxū
 fnawiechaxmūpexechiraūgū, erü Yudū
 chixī. Rü Beyamītanūxū chixī. Rü
 chaunatū rü chauē rü Yudūgū tixīgū, rü
 ngēmaçax i choma rü Yudūxūchi chixī. Rü
 choma rü Parichēuchirex chixī, rü pema
 nūxū pecuax rü ngēma Parichēugū rü
 meāma nanaxaure i Tupanaārū mugū ga
 Moiché ūmatūxū. ⁶Rü yema na meā
 chayanguxēēchaūxūçax ga yema mugū ga
 Moiché ūmatūxū, rü yemaçax nawe
 chingēchigū ga yema duūxūgū ga
 Ngechuchuaxū yaxōgūxū. Rü yema na
 aixcūma meā chanaxaurexūçax ga yema
 mugū ga Moiché ūmatūxū, rü yemaçax rü
 taxucūriwama texē chauchigaxū tixu ga
 tama na chaxaurexū. ⁷Natürü guxūma ga

yema ūpa chauxçax mexū, rü ñuxma rü
 taxuwama choxū name rü marū íchanatāx
 na Cristuaxūçicatama chayaxōxūçax. ⁸Rü
 ñuxma na Ngechuchu ya Cristu ya chorū
 Corixū na chacuáxū, rü chauxçax rü
 guxūma ga yema ūpa nagu chixūxū rü
 taxuwama name, erü ngēma na Cristuxū
 na chacuáxū rü guxūārū yexera
 narūmemae. Rü guxūma ga yema noxri
 nagu chixūxū rü marū nūxū charūxo na
 Cristuwe charūxūxūçax rü noxri duūxū na
 chiūxūçax. Rü chauxçax rü ñoma
 guxchirerūū nixī ga yema ūpa nagu
 chixūxū ega Cristumaā nūgū chananguxgu.
⁹Rü yemaācū nūxū charūxo ga guxūma ga
 yema na Cristuarū duūxū na chiūxūçax. Rü
 ñuxma rü Tupanapexewa chame erü
 Cristuaxū chayaxō. Rü tama ngēma na
 chameciimaxūçax rü exna mugū
 chaxaurexūçax nixī na chamexū i
 napexewa. Natürü ngēma na Cristuaxū
 chayaxōxūçax nixī i nūgūçax choxū
 namexēēxū ya Tupana. ¹⁰⁻¹¹Rü ngēma
 ñuxma chanaxwaxexū nixī na aixcūma
 Cristuxū chacuáxū rü chowa na
 nangēmaxū i ngēma pora ga wena
 Cristuxū írudaxēēxū i ñuxma nūxū
 ngēmaxū. Rü yema ngúxū na yangexū ga
 nūma rü na nayuxū rü ngēxgumariūtama
 chanaxwaxe i íchamemare na naxçax
 ngúxū chingexū rü naxçax chayuxū na
 yixcama choma rü ta yuwa ícharūdaxūçax.

**Pauru naxçax nadau na Cristuçax
 namaxūxū ñuxmatáta
 Tupanaxūtawa nangu**

¹²Rü ñuxma na ngēma ñachaxū
 pemaā rü tama chanaxwaxe i nagu
 perūxīnūē na guxūxū chacuáxū i
 Cristuchiga, rü exna guxūwama na

chamexũ. Natürü guxũ i ngunexũgu rü naxçax chadauama na Ngechuchu ya Cristuarü ngúchaũ na chaxũçax, yerü yemaçax nixĩ ga nũma ga chauxçax nadauxũ ga noxrix. ¹³Pa Chaueneegũx, pemaã nüxũ chixu rü chomatama meãma nüxũ chacuax rü ñuxma rü ta tautama nawa changu i ngẽma naxçax chadauxũ. Natürü i ñuxma rü marü nüxũ icharüngũma i guxũma ga yema noxri nagu chixũxũ. Rü ñuxma rü chaugũ chaporaxẽ na aixcũma Cristuçax na chamaxũxũ na nawa changuxũçax i ngẽma maxũ i chopexewaama ngẽmaxũ. ¹⁴Rü ngẽmacax i ñuxma rü naxçax chadau na aixcũma Cristuçax chamaxũxũ ñuxmatáta Tupanaxũtawa changu. Erü chanayauxchaũ i ngẽma ãmare i nũma daxũguxũ i naãnewa naxçax taxçax nangemaxũ i yixema na Ngechuchu ya Cristuarü duũxũgũ ixĩgũxũ. ¹⁵Rü guxãma i yixema na aixcũma Cristuaxũ yaxõgũxũ, rü name nixĩ i ngẽmaacũ nagu tarũxĩnũẽ. Natürü ngẽxguma chi texé i petanũwa toguama tarũxĩnũgu, rü Tupana tá tũxũ nüxũ nacuaxẽ i ngẽma nũma nanaxwaxexũ na nüxũ tacuáxũ. ¹⁶Rü ngẽma inaxwaxexũ nixĩ na aixcũma naga ixĩnũẽchaxũ rü meãma nagu ixĩxũ i ngẽma ore i marü nüxũ icuáxũ. ¹⁷Pa Chaueneegũx, chanaxwaxe i chauxrũũ nagu pexĩ i ngẽma pexũ nüxũ chadauxẽxũ na namexũ. iRü penangugũ na ñuxacũ meã namaxẽxũ i ngẽma togũ i duũxũgũ i toma tamaxẽxũacũma maxẽxũ! ¹⁸Rü marü muẽxpũxcũna pemaã nüxũ chixu, rü ñuxma rü changechaũacũma rü chaxauxacũma wena pemaã nüxũ chixu

rü nangẽxma i muxũma i duũxũgũ i Cristuarü uwanürũũacũma maxẽxũ. Rü nümagũ rü tama nüxũ nacuaxgũchaũ na Cristu curuchagu naxçax yuxũ. ¹⁹Natürü ngẽma duũxũgũ rü tá dũxwa inayarũxo. Rü ngẽma naxũneãrũ ngúchaũ nixĩ i norü tupana ixĩxũ. Rü woo nüxũ nacuaxchirex na wũxi i ãne na yĩxũ i ngẽma chixexũ natürü namaã nataãegũama. Rü ñoma i naãneãrũ ngẽmaxũguxicatama narũxĩnũẽ. ²⁰Natürü i yixema rü daxũguxũ i naãnewa tũxũ nangẽxma i tachica. Rü ítananguxẽ na daxũguxũ i naãnewa taxçax ne naxũxũ ya tórü Cori ya Ngechuchu ya Cristu ya tórü Maxẽxẽeruũ. ²¹Rü ñaã taxũne i yuxwaxexũ rü nũma ya Cristu tá nanaxũchicũi na naxũne i mexẽchixũrũũ yĩxũçax. Rü ngẽma norü pora i namaã guxũtũwa nangẽxmaxũ, rü ngẽmamaãtama tá nanaxũchicũi i taxũne na noxrürũũ yĩxũçax.

Ñuxma na tórü Coriarü ixĩgũxũ rü name nixĩ na guxũguma namaã itaãegũxũ

4 ¹Rü ñuxma Pa Chaueneegũ ya Pexũ Changechaũgũxe rü Poraacũ Pexũ Chadauxchaũgũxe, rü ngẽma marü pemaã nüxũ chixuxũrũũ chanaxwaxe i meã tórü Coricax pemaxẽ erü pema nixĩ i chorü taãẽ rü chorü ãmare i Tupana choxna ãxũ pixĩgũxũ. ²Rü nüxũ chacaaxũ i taeyaxgũ i Ebódia rü Chitique na nũgũmaã nangũxmũẽxũçax, erü nümagũ rü tórü Corixacũgũ nixĩgũ. ³Rü cumax, Pa Chomücũ ya Mecũ i Wũxigu Tupanaãrũ Puracũwa Chomaã Puracũcũx, rü cuxna naxçax chaca na nüxũ curüngũxẽxũçax i ngẽma taxre i

taeyaxgü, erü nümagü rü wüxigu chomaã rü Cremetemaã rü ngëma togü i chomücügü i Tupanaärü poperawa marü ngoxégagüxümaã napuracüe i Tupanaärü orearü uwa. ⁴Rü ñuxma na tórü Coriarü pixīgüxü, Pa Chaueneëgüx, rü name nixĩ i guxüguma namaã petaãëgü. Rü wena pemaã nüxü chixu, rü ipetaãëgü! ⁵Rü chanaxwaxe i meã pemaxë na guxüma i duüxügü pexü nacuxgüxücax na aixcüma mexü i duüxügü na pixīgüxü. iRü nüxna pecuxächie na tórü Cori rü paxa tá nataeguxü na núma naxüxü! ⁶iRü taxucaxma penaxixächiaëgü! Natürü ngëxguma woo tacü pexü üpetügu rü guxüguma name nixĩ na Tupanamaã nüxü pixuxü i perü yumüxëwa. iRü naxcax ípeca i norü ngüxëë i ngëxguma tacü pexü guxchaxgu, rü moxë nüxna pexägü! iRü ngëmaäcü Tupanamaã nüxü pixu i guxüma i ngëma nüxna naxcax pecagüchaüxü! ⁷Rü ngëmaäcü i nüma ya Tupana rü tá pexü nataãëxëë namaã i wüxi i taãë i mexëchixü i guxüma i taãë i nüxü icuáxüärü yexera mexëchixü. Rü ñuxma na Ngechuchu ya Cristuarü duüxügü pixīgüxü, rü ngëma taãë i Tupana pexna äxü rü tá nüxna pexü ínapoxü i ngëma chixexü i nagu perüxĩnüëchaxü.

Name nixĩ i nagu tarüxĩnüë i guxüma i tacü i aixcüma mexü ixixü

⁸Rü ñuxma Pa Chaueneëgüx, rü name nixĩ i nagu perüxĩnüë i guxüma i ngëma ore i aixcüma ixixü, rü guxüma i ngëma nacüma i taxucürwama texé chixri nachiga idexaxü. Rü ngëmaäcü rü name nixĩ i nagu perüxĩnüë i guxüma i ngëma

ore i aixcüma meã iwéxü rü guxüma i ngëma Tupanapexewa mexü, rü guxüma i ngëma mexü i duüxügü namaã taãëxü, rü guxüma i ngëma aixcüma duüxügüpexewa mexü. Rü name nixĩ i ngëmagu perüxĩnüë. ⁹Rü chanaxwaxe i aixcüma penaxü i ngëma pexü changüxëëxü, rü ngëma pexü namaã chixucuxëgüxü, rü ngëma chauxütawa nüxü pexĩnüëxü, rü ngëma chauxütawa nüxü pedaxü na chanaxüxü. Rü ngëxguma ngëmaäcü pemaxëgu rü pemaã tá inarüxäüx ya Tupana ya tamaã irüngüxmücü rü tüxü taãëxëëcü.

Yema Piripucŭāx ga yaxögüxü rü diërumaã Pauruxü narüngüxëëgü

¹⁰Rü ñuxma na chorü Coriarü chiixü, rü poraäcü chataãë erü wenaxärü choxna pecuxächie rü choxü perüngüxëë. Rü choma nüxü chacuax rü pema rü guxüguma choxü perüngüxëëchaü, natürü taguma pexü natauxcha ga na penaxüxü ga yema.

¹¹Rü tama ngëma na tacü choxü taxuxücax nixĩ i pemaã nüxü chixuxü i ngëmachiga. Erü choma rü marü chomaã nixü na namaã chataãëxü i ngëma choxü ngëxmaxü. ¹²Rü nüxü chacuax na ñuxäcü na yixü ega guxü choxü taxugux, rü nüxü chacuax na ñuxäcü na yixü ega choxü namuxüchixgu. Rü marü chomaã nixü na namaã chataãëxü i ngëma choxü ngëxmaxü woo changaxpütüwegu, rü exna woo chataiyaxgu, rü exna woo choxü namuxüchixgu rü exna woo choxü natauxguma. ¹³Rü Cristu nixĩ ya choxü poraxëëcü, rü ngëmacax chomaã nanguxü na chanaxüxü i guxüma i

ngẽma Tupana naxwaxexũ na
chanaxũxũ. ¹⁴Natürü ga pema rü wüxi
ga mexũ choxũ pexũgü ga yexguma
choxũ natauxyane choxũ
perüngũxẽegũgu. ¹⁵Rü pema, Pa
Yaxõgũxũ i PiripucũĀx, rü meãma nüxũ
pecuax rü yexguma noxri
Machedóniããnewa nüxũ chixuxgu ga
Tupanaãrũ ore, rü yexguma yéma
íchaxũxũgu, rü pexicatama nixĩ ga
ãmare choxna pexãxũ naxcax ga yema
ngũxẽẽ ga chauxũtawapayaxuxũ. ¹⁶Rü
yexguma Techarónicaarũ iãnewa
chayexmayane, rü pema rü yéma
chauxcax penamugũ ga perũ ãmare na
choxũ perüngũxẽegũxũcax. Rü tama
wüxicanaxĩcatama nixĩ ga yemaãcü
choxũ na perüngũxẽegũxũ. ¹⁷Rü woo
perũ ãmaremaã chataãẽ, natürü
yexeraãcü chataãẽ erũ ngẽma choxũ na
perüngũxẽegũxũcax rü Tupana tá ãmare
pexna naxã. ¹⁸Rü ñuxma rü marũ choxũ
nangẽxma i guxũma i tacü i
chanaxwaxexũ, rü aixcũma ngẽmaãrũ
yexera choxũ nangẽxma. Rü ñuxma na
Epaporudĩtu núma nangexũ i perũ
ãmare, rü taxuũma choxũ nataxu. Rü
ngẽma perũ ãmare i chauxcax núma
pemuxũ, rü Tupanapexewa rü

namexẽchi, rü núma rü poraãcü namaã
nataãẽ. ¹⁹Rü ngẽmacax ya chorũ
Tupana rü norũ ngẽmaxũgũ i
mexẽchixũwa tá pexna nanaxã i
guxũma i tacü i pexũ taxuxũ. Rü
ngẽmaãcü tá nanaxũ erũ Ngechuchu ya
Cristuarũ duũxũgũ pixĩgũ. ²⁰Rü name
nixĩ i guxũguma nüxũ ticuaxũũgũ ya
Tanatũ ya Tupana. Rü ngẽmaãcü yĩĩ.

**Pauru nanaguxẽẽ ga norũ popera rü
wenaxãrũ yema duũxũgũxũ narũmoxẽ**

²¹Rü chanaxwaxe i chauéegagu nüxũ
perũmoxẽgũ i guxũma i taeneẽgũ i
Ngechuchu ya Cristuaxũ yaxõgũxũ.
Rü ngẽxgumarũ ta pexũ narũmoxẽgũ
i ngẽma taeneẽgũ i chauxũtawapayaxuxũ.
²²Rü ngẽxgumarũ ta
pexũ narũmoxẽgũ i guxũma i
taeneẽgũ i núma Dumawa
ngẽxmagũxũ. Rü ngẽma yexera pexũ
rũmoxẽgũxũ rü ngẽma nixĩ i taeneẽgũ
i Dumaãrũ ãẽxgacũ ya tacũxũ-tawapayaxuxũ.
²³Rü chanaxwaxe i tórũ
Cori ya Ngechuchu ya Cristu pexũ
narüngũxẽẽ i guxãma i pemax. Rü
ngẽmaãcü yĩĩ.

*Rü nuãma pexna,
Pauru*